

**Uunga siunnersuut: Aningaasarsianit akileraarutit pillugit Inatsisartut inatsisaata
llanngortinneqarneranik Inatsisartut inatsisaat nr. xx, xx xx 2016-imeersoq
(Soraarnerussutisiaqarnissaq siunertaralugu ileqqaakkat, kinguaariinnut tullermut ni-
kisitsinermi aningaasanut killiliussamik qaffaaneq)**

pillugu

Aningaasaqarnermut Akileraartarnermullu Ataatsimiititaliap

inatsisissatut siunnersuutip aappassaaneerreqarneranut

**ILASSUTAASUMIK
ISUMALIUTISSIISUTAA**

Ulloq 31. oktober 2016-imi inissitsiternerup kingorna ataatsimiititaliap ilaasortarai:

Inatsisartunut ilaasortaq Jens Immanuelson, Siumut, siulittaasoq
Inatsisartunut ilaasortaq Randi V. Evaldsen, Demokraatit, siulittaasup tullia
Inatsisartunut ilaasortaq Nikolaj Jeremiassen, Siumut
Inatsisartunut ilaasortaq Jess Svane, Siumut
Inatsisartunut ilaasortaq Ane Hansen, Inuit Ataqatigiit
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Bendt B. Kristiansen, Inuit Ataqatigiit

UKA 2016-imi ulloq 20. oktober aappassaaneerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inatsisissatut siunnersuut soraarnerussutisiat pillugit inatsisinik ineriartortitsinerup, utoqqaliner-siutit pillugit inatsit UKA 2015-imi aaqqissuuteqqinneqarmat aallartinneqartup, aammalu soraarnerussutisiaqarnissamut aaqqissuussinernut nunani allaniittunut akiliutit akileraaruser-neqartalernissaannik UPA 2016-imi akuersissutigineqartumik malitseqartup ilagaa. Aamma inatsisissatut siunnersuut soraarnerussutisiaqalernissamut pinngitsoorani ileqqaarnissamik aaqqissuussinerit pillugit inatsisissatut siunnersuummut uunga ilutigitillugu saqqummi-unneqartumut attuumassuteqartinneqassaaq.

2. Siunnersuutip Inatsisartunit siullermeerneqarnera

Siunnersuut siullermeerneqarami ataatsimiititaliamit suliarineqartussanngorlugu innersuunneqarpoq, taamaalillunilu siunnersuut pillugu isumaliutissiissuteqartoqarluni. Ataatsimiititaliap isumaqatigiittup isumaliutissiissummini siunnersuutip akuersissutigineqarnissaa inassutigaa. Siunnersuut pingajussaaneerineqannginnermini ataatsimiititaliamut suliarineqaqqittussanngorlugu innersuunneqassasoq ataatsimiititaliamit isumaliutissiissummi kaammattuutigineqarpoq, taamaaliornikkut allannguutissatut siunnersuut Naalackersuisunit saqqummiunneqalersaartutut ataatsimiititaliamit ilisimaneqartoq ataatsimiititaliamit isummerfigineqarsinnaaqqullugu, taamaalillunilu Naalackersuisut ataatsimiititaliap apeqqutaanut akissutaat ataatsimiititaliap siunnersuummik suliarinninneranut ilanngunneqarsinnaaqqullugit.

3. Ataatsimiititaliap siunnersuummik suliarinninnera

Naalackersuisut pingajussaaneerinissamut allannguutissatut siunnersuutaat ataatsimiititaliamit misissorneqarpoq aammalu suliaq pillugu makkuninnga oqaaseqaateqarumalluni.

Naalackersuisut pingajussaaneerinissamut allannguutissatut siunnersuutaat, ilaatigut siunnersuummik PFA Soraarnerup Finanstilsynimit akuersissummik pisinnaanissaanut periarfissiusussatut naatsorsuutigineqartumik imaqarpoq.

PFA Soraarnerup soraarnerussutisiaqarnissamut aqqissuussaasa PFA Pensionimut nuunneqarnissaat Finanstilsynimit akuerineqassappat nuussinerup kingunerisaanik sullitat ajornerusumik inissisimalinnginnissaat piumasaqaataasoq PFA Soraarnerup 19. september 2016-imi saaffiginissummini paasissutissiissutigaa.

Allannguutissatut siunnersuutit arlallit saqqummiunneqarput, taakku ilaatigut nalunaaruteqarnissamut akiliuteqarnissamullu killissarititap sivitsorneqarnissaanut aammalu ileqqaakkat annaasaqaratarfiunerpaasinnaasumik aningaasaliissutissatut inissinneqannginnissaanut kiisalu soraarnerussutisiaqarnissamut aqqissuussinerit akiligassaqarfinit akileeqqusisinnaanernut illersugaanerannut attuumassuteqarlutik. Taakku ataatsimiititaliamit naammagisimaarneqarput. Naalackersuisut allannguutissatut siunnersuummut oqaaseqaataanni ilaatigut makku naammagisimaarlugit ataatsimiititaliamit naammagisimaarneqartutut immikkut oqaatigineqassapput:

- ”Tunniussivigisassat pillugit malittarisassat aqqissuunneqassasut siunnersuutigineqarpoq, taamaasilluni piginnittup kingornussisussani imaluunniit qaniginerpaasani tigusisussatut toqqarsinnaanngortillugit. Taaguutit taakku ilaasunut tamanut tigusisussaasut pillugit allaffissornermi ajornannginnerulersitsissapput. Kingornussisussat pineqarnerini, aapparissat, inooqatit meeqqallu avataanni allat aamma pineqartarput. Taamaattumik naatsorsuutigineqarpoq, soraarnerussutisiaqarnissaq siunertaralugu ileqqaakkani aningaasat anner-tunerusut piginnittup qimataasa avataatigut tunniunneqartassasut taamaasillunilu akiliisitsiniartartoqarpata taakku avataatigut.”
- ”Siunnersuutigineqarpoq erseqqissarneqassasoq, § 39, imm. 1-imitut, aapparissap imaluunniit inooqatigisap soraarnerussutisiaqarnissaanut sillimmammik, meerrarisat soraarnerussutisiaqarnissaannut sillimmammik, innarluuteqalernermi soraarnerussutisiaqarnissamut sillimmammik ataavartumik soraarnerussutisiaqarnissaq siunertaralugu ileqqaakkanut ilanngussisoqarsinnaasoq.”


- ”Siunnersuutigineqarpoq § 47 f-imi, imm. 5-istik nutaamik ilanngussisoqassasoq, soraarnerussutisiaqarnissaq siunertaralugu ileqqaakkani aningaasat, qanoq pineqassanersut, aningaasat tamakkerlugit pineqannginnerani piginnittoq toqussagaluarpas aalajangerneqarluni.”

Taakku tassaapput ataatsimiititaliap siunnersuummik suliaqarnermini paasinarsisinneqarnissaannik kissaatigisaasa ilaat.

4. Ataatsimiititaliap inassuteqaatai

Tamanna tunngavigalugu siunnersuut Inatsisartunit akuerineqassasoq **ataatsimiititaliamit isumaqatigiittumit inassutigineqarpoq.**

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut pingajussaaniigassanngortippaa.




Jens Immanuel, Siulittaasoq




Randi V. Evaldsen




Peter Olsen




Nikolaj Jeremiassen



Jess Svane



Ane Hansen



Bendt B. Kristiansen